

SAPAGKAT YUGTO RIN ANG KARERA NG ATLETA

Adrian Pregonir

Maraming pandiwari ang isports:
Hatak, galaw, tikas, bigwas, talon,
tindig, langoy, hambalos, sayt, tira,
gapang, bilis, dapa, hinga, palo,
na pinanday at pinalipas ng taon
at mga taon upang umiral ang lakas
na waring dumaraan sa simula at pagkatapos
na minsang nakaliligtaang ito'y laban-sa-sarili.

Pinipiga nito ang laang hangganan
ng iyak at pagal upang sukatin ang haba
ng pagdadalawang-isip ng mga kondenado sa impiyerno
ng iyong pagkatalo at pagkadapa sa kahinaan.

Lilibutin mo ang koliseo kaharap ang humaharap
na magdidikta ng iyong kahaharapin sa ruweda
ng sumisigabong halakhak, palakpak at hiwayan
ng sangkatauhan. Dadaan ka sa pulang karpeta ng saya
bitbit ang tropeo na pinagsikapan mo sa ilang
segundo at minuto sa lagpas dalawang taon
mong ensayo sa gym at oval na iyong lubos pangarapin.

Ngunit minsan, naiilap ang liwanag sa pagpapatuloy,
humihinto rin ang musika ng masa, ang sigaw at palakpak
at lulukubin ka ng hiyawan ng iyong pagkatalo
at pagdapa sa karpeta ng iyong pagod at pagsisisi.

Minsan diyan mo natatalos ang iyong buhay:
tambalang tagumpay-kabiguan, pagbubunyi-pagkalugami.